



Inatsisartunut ilaasortaq
Kalistat Lund, Inuit Ataqatigiit

Kuannersuit pillugit § 37 naapertorlugu apeqquteqaammut nr. 2016-263-imut akissuteqaat

Inatsisartut Suleriaasianni § 37 naapertorlugu Kuannersuit pillugit apeqqutit matuma kingulianiittut saqqummiuppatit. Akissuteqaatip matuma suliarineqarneranut atatillugu naalakkersuisoqarfinni suliassaqarfinnit attuumassuteqartunit ilanngussassanik piniartoqarpoq. Tassani pineqarput Inuussutissarsiornermut, Suliffeqarnermut, Niuernermut Nukissiuteqarnermullu Naalakkersuisoqarfik kiisalu Aatsitassanik Suliassaqarfinnut Avatangiisinut Aqutsisoqarfik.

30-11-2016
Sulaap nr. 2016-17805

Postboks 930
3900 Nuuk
Tlf. (+299) 34 68 00
E-mail: mlsa@nanor.gl
www.govmin.gl

1. GME aatsitassarsiorsinnaanissaminut qinnuteqariaanannngorsimava?

Akissut:

Piaanissamut akuersissummut qinnuteqarnerup ingerlanera, suliassap inuiaqtigiaanni piujuartitsiviusumik sunniuteqarnissaanik nalilersuinermut (VSB-imut nassuaat) aamma suliassap avatangiisinut sunniuteqarnissaanik nalilersuinermut nassuaammut (VVM-imut nassuaat) missingiutitut siullertut iluseqartunik, suliassap nassuaataanik nassiuissinermi, aallartereertarpoq. Allakkiat taakkua nassiuinneqareernerisa kingorna, pinngitsoorani pisussatut piumasaqaataasumik ulluni 35-ini piareersaataasumik tusarniaassutigalugu nassiuinneqartarpoq.

Greenland Minerals and Energy A/S (GME) 2014-imi aggustimi suliassamut nassuaammik taamaattumik nassiuissivoq. Suliassamut nassuaat taanna pinngitsoorani pisussatut piumasaqaataasutut piareersaataasumik tusarniaassutigalugu nassiuinneqarpoq.

Suliassamut nassuaat pillugu piareersaataasumik tusarniaanermiit taassuminnga oqaaseqaatit, apeqqutit akissutilu aallaavigalugit, ingerlatseqatigiiffiup tamatuma kingorna suliassamut VSB-imut aamma VVM-imut nassuaatit nutartissavai iluarsissallugillu.

GME-p VVM-imut aamma VSB-imut nassuaatinngut missingiut nutartigaq ulloq 2. december 2015 tunniuppa, tassani piareersaataasumik tusarniaanermiit ilanngussat attuumassuteqartut ilanngunneqarlutik. Tunniussineq taanna, missingiutit qanoq iluarsineqarsinnaanersut ilitsersorneqarnissaq siunertaralugu, pivoq. Tamatumunnga pissutaavoq allakkiat imarisamikkut pitsaassutsimikkullu aalajangersakkani minnerpaaffissanik naammassinnissimasut naliliisoqarpat, aatsaat tamanut ammasumik tusarniaassutigineqarsinnaammata. Aatsitassanut

oqartussaasut taamaalillutik VVM-imut aamma VSB-imut nassuaatit iluarsineqarnissaat pillugu 2015-imi decembarimiilli GME ingerlaavartumik oqaloqatigisarpaat.

GME-p tamatuma saniatigut, aamma imarisaa naammaginarnersoq ilitsorsorneqarnissaq eqqarsaatigalugu, 2016-imi januaarimi imminut akilersinnaassutsimut misissuineq tunniuppa. GME tamatuma kingorna nalunaarpoq, imminut akilersinnaassutsimut misissuinertik nutartereerlugu – Aatsitassanut oqartussaasunut nassiunneqarani. Taamaattumik aatsitassanut oqartussaasut GME-mut eqqumaffigeqquaat VVM-imut aamma VSB-imut nassuaatit tusarniaassutigineqarsinnaanissaannut, piumasaqaatit aalajangersimasut naammassineqarsimanissaat pisariaqartoq. Taakkununnga ilaavoq imminut akilersinnaassutsimut misissuineq nutartigaq aatsitassanut oqartussaasunut nassiunneqarsimassasoq akuerineqarsimassasorlu.

Piaanissamut akuersisummik qinnuteqaat taamaalilluni suliap ingerlanerinik immikkoortunik arlalinnik aammalu allakkianik arlalinnik ilaqrpoq, ingerlaavartumik suliarineqartussanik, tamanut saqqummersinneqartussanik, naggataatigullu Naalakkersuisunit nalilersorneqartussanik.

2. GME-p VVM-imut VSB-mullu suliaannut Naalakkersuisut malinnaatinneqarpat?

Akissut:

Matuma siuliani oqaatigineqartutut VVM-imut nassuaammut aamma VSB-imut nassuaammut missingiut siulleq GME-p 2015-imi decembarimi tunniuppa. GME-p maannakkut nassuaatinut missingiutit nutarterlugit aammalu misissuinernik annertunerusunik suliaqartoqassanersoq suliarai. GME-p tassunga atatillugu aatsitassanut oqartussaasut ingerlaavartumik oqaloqatigisarpai.

3. Naalakkersuisut malinnaatinneqarsimagunik, misissuinerit sumut killippat?

Akissut:

Apeqqummut 1-imut aamma 2-imut akissuteqaatit takukkit.

4. Maannamut GME-p misissuinernut killiffiat aallaavigalugu, qinnuteqariaannanngulersutut nalilerneqarpat?

Akissut:

Apeqqummut 1-imut akissuteqaat takuu.

5. Kinamiut suliffeqarfiataat, Shenghe, GME-mi piginneqataassutit 60%-iannik piseqqaartussaatsitaanissaannik atsioqatigineqarsimava?

Akissut:

Naamik.

6. Paassisutissanik tamakkiisumik tunniussisoqarnissaannik GME-p tunuarsimaarfiginninera, Naalakkersuisuniit qanoq

**isigineqarpa? (Matumani pivakka piginneqataassutinut
tunngasut aamma VVM-imut tunngatillugu tusagassiorfinniit
paasissutissanik qinnutigineqartunut
tunniussisoqannginnissaanik GME-miit
piumasaqartarsimanerit).**

Akissut:

Allagaatinik takunninnissamut piumasaqarsinnaatitaaneq, pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaat nr. 9, 13. juni 1994-imeersoq (pisortat ingerlatsinerannut inatsit) naapertorlugu kikkunnut tamanut atuuppoq. GME-mit naammagittaalliuutaasoq inatsisit atuuttut naapertorlugit suliarineqassaaq. GME-p qinnuteqaataanik aatsitassanut oqartussasup suliarinninera aamma tassunga tunngatillugu qinnuteqaatinit allanit allaanerusumik pineqanngilaq.

Inussiarersumik inuulluaqqusillunga

Múte Bourup Egede